

## **Peqqussutissatut siunnersuummut oqaaseqaatit**

### **Oqaaseqaatit nalinginnaasut**

#### *1. Peqqussutissatut siunnersuutip tunuliaqutaa*

Inatsisartut 2002-mi upernaanerani ataatsimiinnermi akuersissutigaa Atuarfik pillugu peqqussut nutaaq, Inatsisartut peqqussutaat nr. 8 21. maj 2002-meersoq.

Siunnersuutip matuma siunertaraa atuartitaasussaatitaanerup ukiunit qulingiluanit ukiunut qulinut sivitsorneqarnissaa.

Tamatumunnga tunngaviuvoq meeqqat inuusuttullu ataavartumik atuartinneqarnissaasa qulakkeerneqarnissaa, tamatuma kingunerisaanik periarfissinneqassammata ingerlaqqiffiusumik ilinnialersinnaanissamut, kiisalu Kalaallit Nunaanni aammalu nunarsuarmioqatigiinni atugarissaarlutik innuttaaqataanissamut pisinnaatitaaffiisa qulakkeerneqarnissaat.

Atuarfik pillugu peqqussutip piumasaraa atuartitaasussaatitaaneq ukiunik qulinik sivissuseqassasoq, peqqussummi atuuttumi § 3 naapertorlugu. Tamanna atuutilersinneqarsinnaasimanngilaq piginnaatitaanermut inatsit pissutigalugu, tassani aalajangerneqarsimammat Kalaallit Nunaanni atuartitaasussaatitaaneq ukiunik qulingiluanik sivissuseqartoq, takuuk Kalaallit Nunaanni Meeqqat atuarfiat pillugu inatsimmi nr. 579 29. november 1978-meersumi § 2, imm. 1.

Atuarfik pillugu peqqussutip atulerneratigut atuarfiup aqqissuussaanera imaattoq eqqunneqarpoq, meeqqat atuarfianni atuarneq ukiuni qulini atuartsiviussasoq, trinanut pingasunut agguarneqarluni, tamarmik immikkut imarisamikkut periutsimikkullu ataqatigiissunik.

#### *2. Malittarisassat atuuttut*

Atuartaasussaatitaaneq naasarpog ukiut qulingiluat ingerlareerneranni imaluunniit 9. klassep kingornagut Kalaallit Nunaanni Meeqqat atuarfiannut inatsit tunngavigalugu, atuartormi ingerlaannartumik 1.klassemi atualertarpoq b̃rnehaveklasseqqaarnani.

Tamannalu isumaqarpoq atuartut aalajangersinnaammata atuarfik 9. klassep kingornagut qimassallugu ukiuni qulini atuartaasussaatitaaneq Atuarfik pillugu peqqussummi isumagineqartoq naammasseqqaanngikkaluarlugu. Atuartut taama aalajangertut atuartunit ukiuni qulini atuarsimasuninngaanniit ilisimasaqassutsikkut inerisimassutsikkullu kiisalu ilinniaqqinnissamut periarfissatigut annikinnerusumik periarfissaqalertarput.

Atuartitaasussaanerup atuartitaanerullu takissusaata naapertuutinnginnerata aporfisimavaat Kalaallit Nunaanni Meeqqat atuarfiannut inatsit naapertorlugu atuartitaasussaanerup tallinissaanut periarfissaqarsimangimmat.

Maannakkorpiaq qallunaat inatsisartuanni Kalaallit Nunaanni Meeqqat atuarfiannut inatsit allanngortinniarlugu suliarineqarpoq. Meeqqat atuarfiat pillugu inatsisiliorneq suli tamakkiissumik tiguneqanngilaq, taamaattumik qallunaat inatsisartui atuarfik pillugu inatsisiliornermut akisussaapput. Kalaallit Nunaanni Meeqqat atuarfiannut inatsisip allannguutissatut siunnersuummi siunnersuutigineqarpoq Kalaallit Nunaanni atuartitaasussaataaneq minnerpaamik ukiunik qulingiluanik sivissuseqassasoq. Taamaaliornikkut qallunaat inatsisartuisa nunatsinni Inatsisartut piginnaatissavaat namminneq kiffaanngissuseqarlutik aalajangersinnaan-ngussagaat atuartitaasussaataaneq qanorpiaq sivissuseqarnissaa, kisiannili sivikinnerpaamik ukiut qulingiluat.

### *3. Siunnersuutip imarisaa*

Peqqussutissatut siunnersuutip atuartitaasussaanerup atuartitsinerullu takissusaata naapertuutinnginnera aaqqissavaa atuartitaasussaataaneq ukiunut qulinngortinneratigut. Taamaakkaluortoq suli periarfissaqassaaq atuartitaasussaataaneq ukiumik ataatsimik sioqqullugu atuartitaajunnaarsinnaanissaq.

Siunnersuut isumaqarpoq atuartut tamarmik assigiimmik pineqarnissaannik, tamarmimmi ukiuni qulini atuartitaassagamik.

### *4. Pisortanut allaffissornikkut aningaasaqarnikkullu kingunerisassai*

Siunnersuut allaffissornikkut aningaasaqarnikkullu pisortanut kinguneqassanngilaq, tassami atuartut amerlanersaasa ullumikkut ukiut qulit atuartitaasussaataaneq naammassisarmassuk.

### *5. Inuussutissarsiuteqartunut allaffissornikkut aningaasaqarnikkullu kingunerisassai*

Siunnersuut allaffissornikkut aningaasaqarnikkullu inuussutissarsiuteqartunut kinguneqassanngilaq.

### *6. Avatangiisinut pinngortitamullu kingunerisassai*

Siunnersuut avatangiisinut pinngortitamullu kinguneqassanngilaq.

### *7. Innuttaasunut allaffissornikkut kingunerisassai*

Siunnersuut allaffissornikkut innuttaasunut kinguneqassanngilaq. Siunnersuut atuutsinneqalerfimmimi nalaani 9. klassemi atuartunut kinguneqassanngilaq.

### *8. Naalagaaffeqatigiinnermut namminersornermullu tunngasortai*

Siunnersuut Naalagaaffeqatigiinnermut Namminersornermulluunniit kinguneqassanngilaq.

### *9. Pisortanut kattuffinnullu tusarniaaneq*

Siunnersuut aningaasaqarnermut pisortaqarfimmut, KANUKOKA-mut, IMAK-imut

aamma Kalaallit Nunaanni sulisitsisut peqatigiiffiannut tusarniaassutigineqarsimavoq.

Aningaasaqarnermut Pisortaqaarfik, IMAK kiisalu Kalaallit Nunaanni Sulisitsisut peqatigiiffiat oqaaseqaatseqanngillat.

KANUKOKA-p siunnersuummi § 1, nr. 4 oqaaseqaateqarfigaa, taanna tunngavigalugu § 26, imm. 3-p allanngortinniarneqarmat:

"Akerlianik KANUKOKA-p isumaqarpoq atuartumik aatsaat 9. klassemiit immikkorluinnaq pissutissaqartillugu angajoqqaat piumasaqarpata anisinnaanngortinneqarsinnaaneq naleqquttuunngitsoq naak ullumikkut 8. klassep kingorna atuartitaajunnaartoqarsinnaasoq.

Taamatut atuartitaajunnaarnissamut periarfissaq KANUKOKA-p paasinnittaasia malillugu killilerujussuarmik immikkorluinnarlu pisoqartillugu aatsaat atorneqartarpoq. Pissutsit periarfissap atorneqarfigisai tassaasarput pissutsit immikkorluinnaq ittut atuartunut ataasiakkaanut atuutileraangata. Angajoqqaat qinnuteqalersinnagit kommunelu atuartitaajunnaarnissamut akuersinissamut aalajangertinnagu atuortoq angajoqqaallu sukumiisumik siunnersorneqartarput isumasiorneqartarlutillu. 8. klassep imaluunniit 9. klassep kingornagut atuartitaajunnaarnissamut akuerineqassagaanni aatsaat tamanna pisinnaavoq atuortoq inuussutissarsiuteqalernissamut ilinniagaqalernissamullu pilersaarusionerfigineqarsimappat.

Taama immikkorluinnaq pisoqartillugu KANUKOKA-p takusinnaanngilaa piffissaliunneqarsimasimasup aamma suli kinguartinneqarnissaa, tassami 1980-imili ukiuni qulingiluani atuartitaasussaatitaaneq eqqunneqareersimammat. Angajoqqaat atuarfillu isumaqatigiippata atuortoq inuttut allatullu ineriartuutissaminik allaasumik meeqqat atuarfiannit inuussutissarsiummik allaasumik pissarsiaqarniarpat, tigumminiinnarnissaq suli ukiumik ataatsimik sivitsussappat, ajortumik kinguneqaannarsinnaanera annilaanngatigineqarpoq – soorlu isumaqatigiinnginnerit, atuarfimmik qatsussinerit, atuartumut suli ajornartorsiortitsineruliinnassapput."

*Pissutissaqanngilaq KANUKOKA-p tusarniaanermi akissutaa tunngavigalugu siunnersuut allanngortissallugu. Eqqorpoq peqqussummi § 26, imm. 3 naapertorlugu atuartitaasussaaajunnaarsinnaanermut akuerineqarsinnaaneq siunnersuutikkut ukiumik ataatsimik sivitsorneqassammat tamanna 9. klassep kingornagut aatsaat pisinnaalluni naak siusinnerusukkut 8. klassep kingornagut pisinnaasimagaluartoq, kisiannili tamanna pissaaq atuartitaasussaatitaanerup sivitsorneqarnera peqatigalugu. Siunertarineqarpoq ilinniartitaanerup qaffassarneqarnissaa. Tamanna tunngavigalugu kissaatiginarpoq atuartut ataasiakkaat ukiuni qulini atuartitaasussaatitaanerup annertunerpaartaa naammassisimassasagaat.*

*Inuiaqatigiit kiisalu meeqqat atuarfiat ukiut 25-it matuma siornagut atuartitaasussaaajunnaarsinnaanermut periarfissap eqqunneqarneraniit allanngorsimaqaat. Ullumikkut siunertaqartumik atuartitaanerup tungaasigut*

*suliniartoqarpoq, tamatumalu nassataraa atuartut ataasiakkaat atuartitsinermi qitiutinneqalersimallutik. Tamakku pillugit atuartitaasussaatitaanermut periarfissamik kinguartitsineq ajoqutaasinnaasumik kinguneqarnaviannngilaq.*

*Aammattaaq § 26, imm. 3-mut oqaaseqaatini pingaartinneqarpoq aalajangersagaq malillugu atuartitaasussaatitaanerp naanissaa ukiumik ataatsimik sioqqullugu atuartitaajunnaarsinnaaneq periarfissaqarmat.*

## **Siunnersuummi aalajangersakkanut ataasiakkaanut oqaaseqaatit**

### *§ 1 pillugu*

Nr. 1-mut

§ 26, imm. 1-mut innersuussut atorunnaarpoq atuarnerp pilersarusiornerata atuartitaasussaatitaanerullu takeqatigiilernerisigut. Atuartitsinerup pilersarusiornera atuartitaasussaatitaanerlu siunnersuummi § 1 nr. 3 malillugu maanna tamarmik ukiunik qulinik sivisussuseqalermata.

Nr. 2-mut

8. klassemit 9. klassemut allanngortitsineq peqquteqarpoq peqqussutip § 26, imm. 3-anik allanngortitsinermik, tassa siunnersuummi § 1, nr. 4.

Nr. 3-mut

Aalajangersaanikkut atuartitaasussaatitaaneq ukiumik ataatsimik tallineqarpoq ukiunik quli-ngiluaniit ukiunut qulinut. Atuartitaasussaatitaanerp atuutilernissaa pissaaq aalajangersakkat tamatumunnga atuuttut tunngavigalugit.

Nr. 4-mut

§ 26, imm. 3,-imik allannguneq pinngitsoorani allanngortitsinerusussavaoq, atuartitaasussaatitaanermik ukiumik ataatsimik sioqqutsilluni atuartitaajunnaarsinnaanermut periarfissaq aalajangiusimaneqassamat, takuuk pisortanut kattuffinnullu tusarniaanermik immikkoortoq.

Aalajangersakkami suli pineqarput atuartut allanik ilinniagaqarusuttut imaluunniit killilimmik atuarnerminnik pissarsiaqarsimasut, taamaammallu piumasqaataanngilaq tamakkiisumik naammassisaqarsimanissaq. Tamatumunnga taarsiullugu aalajangersakkap oqaaseqatigiivini kingullerni aalajangersarneqarpoq, atuartitaasussaaajunnaarnissamat akuerineqarnissaq aatsaat pisinnaasoq atuartut taamatut kissaateqartut inuussutissarsiuteqalernissamat ilinniagaqalernissamullu pilersarusiorfigineqarsimappata.

### *§ 2 pillugu*

Atuutsitsilernissaq aatsaat pisinnaavoq inatsimmik nr. 579-imik novemberip 29-anni 1978-imeersumik allannguinnissamik siunnersuut akuerineqarpat atuutilersinneqarlunilu.

Siunertarineqarpoq atuutsitsilernissaq piaarnerpaamik pissasoq, tamannalu tunngavigalugu siunnersuutigineqarpoq Inatsisartut peqqussutissaat Naalakkersuisut aalajangiineratigut pissasoq. Tamanna isumaqarpoq inatsit tunngaviusoq atuutilerpat nalunaarutiliortoqassasoq. Aalajangersakkap immikkoortuata aappaani qulakkeerneqarpoq peqqussut atuutilerpat tamatuma nalaani 9. klassemi atuartunut atorneqarsinnaassannginnera.